

OPPA a manda carta pa Secretario di Estado cu nan preocupacionnan tocante ultimo acontecimentonan den gobierno


Recientemente e presidente di e Organizacion di Pensionado di Aruba (OPPA) sr. Ivo Valdes, a dirigi un carta (fecha 16 di oktober 2024) na Secretario di Estado di Digitalisacion y Relacionnan di Reino, Zsolt Szabó, pa expresa su preocupacionnan pa e situacion politico actual y e futuro di e demcoracia di pais Aruba.

Den su carta, cu tambe a wordo manda pa su Excelencia Gobernador di Aruba y presidente di Parlamento di Aruba, sr. Valdez ta trece dilanti e preocupacion di parti di su organisacion, cu ta representa e grupo di pensionadonan na Aruba, pa loke ta trata e ultimo acontecimentonan cu a tuma luga den gobierno, cu segun Valdez ta resalta ta un “menasa pa funcionamiento di e democracia.”

Esaki no ta prome carta cu Valdez ta manda pa e Secretario di Estado. Algun luna pasa ya caba OPPA a manda un carta, fecha 22 di juli 2024, tocante e funcionamiento di Parlamento di Aruba y especificamente tocante cuidio di adultonan mayor na Aruba. Pero e organisacion no a ricibiningun reaccion di parti di e Secretario di Estado.

Cu e carta mas recien, Valdes ta indica den e documento, OPPA kier vocifera nan preocupacion relacion cu e ultimo desaroyonan dentro di e gobierno di coalicion saliente actual, cu ta consisti di e partidonan MEP y RAIZ.

E ta menciona e situacion di e minister saliente di MEP,



refiriendo na sr. Glenbert Croes, ken ta sospechoso den e caso portulaca y ta wordo sospecha di abuso administrativo serio y a tuma su retiro pa motibo di esaki.

E presidente di OPPA ta resalta cu esaki riba su mes ta un acontecimiento preocupante, pero cu e situacion a empeora ainda mas na momento cu cu mayoria di Parlamento a pasa un mocion di desconfianza contra un otro minister di MEP, ta trata di sr. Endy Croes ken tabata minister di Enseñansa y Deporte.

Valdez ta agrega cu di otro banda e posicion di partner di coalicion RAIZ tambe a resulta instabil, referiendo na minister demisionario Geoffrey Wever ken a tuma su retiro di su partido RAIZ y a cambia pa un partido nobo cu ainda no tin status oficial.

E ta enfatisa cu e desaroyonan aki ta causando un confusion y preocupacion grandi cerca pueblo y ta cuestiona con e ciudadanonan di Aruba por tin confiansa den un gobierno cu ta wordo afecta pa tipo di irregularidad y instabilidad asina.

“E partidonan cu tin e responsabilidad pa dirigi nos pais ta parce di ta cada bes mas den desordu enfoca riba lucha di poder interno i interesnan personal, enbes di promove e interes publico. Kico pueblo por spera den e circunstancianan aki? Con nos por confia cu gobierno lo tuma responsabilidad y traha na bienestar di e pueblo Arubano, ora cu ta bisto cu tin un falta di union y estabilidad den seno di coalicion?” el a cuestiona.

E presidente di OPPA ta acudi na e Secretario di Estado cu nan preocupacionnan y ta puntra ki pasonan lo tuma pa resolve e crisis aki y reestablece e confiansa di ciudadanonan den institutonan politico.

Alabes nan ta haci un yamada na e Secretario di Estado, como representante di e Corona y wardado di e balornan democratico y di e orden constitucional di Aruba, pa vigila e situacion aki di cerca y, si ta necesario, pa tuma pasonan apropia cu urgencia pa reestablece pueblo su confiansa den e institutonan di Aruba

Valdes ta remarca cu ta crucial pa tin claridad riba con e irregularidadnan aki lo wordo atendi y cu interes di pueblo semper ta keda primordial.

“Den temponan di incertidumbre y instabilidad politico, nos mester di liderazgo cu ta trece nos hendenan hunto y ta mantene nos riba caminda pa un miho futuro y e bienestar di cada ciudadano,” el a enfatisa.

Anteriormente OPPA a manda un carta pa Gobierno di Aruba pa expresa nan preocupacionnan cu tin pa loke ta nan entrada; poder di compra; suma di pensioen; Impuesto y cuidio di salud, mirando e lista di espera pa dokter tin biaha ta hopi largo. Basa riba e carta aki, prome minister a invita e organisacion pa un reunion hunto cu director di SVB/AZV, Edwin Jacobs.

Jacobs a indica cu AZV na e momento aki tin un situacion financiero positivo, sin embargo e specialistanan no ta facil pa haya. Di otro banda el a indica cu ora AZV puntra ta wordo bisa cu no tin lista di

espera.

Mirando cu tin dos version diferente pa loke ta trata cuidio medico di e pensionadonan, durante e reunion a tuma decision cu SVB/AZV lo bay sinta regularmente cu OPPA na mesa pa asina e preocupacionnan di e miembronan di OPPA por haya atencion di biaha.

October ta conoci como e luna di adulto mayor y ta dedica na pone enfoca riba e retonan cu e grupo di comunidad aki ta enfrente. Un di e retonan mas grandi cu e comunidad di adulto mayor ta enfrente ta cuidio, un punto cu e minister demisionario di Asuntonan di Aulto Mayor, Ursell Arends, a indica recientemente nan ta traha riba dje.

Segun e mandatario a informa gobierno a traha cu expertonan local como internacional pa asina desaroya un plan integral pa combati e probelma di cuidio cu tin pa e adultlonan mayor. E plan aki, yama ‘Deltaplan’, el a splica, ta basa riba e concepto cu cuanto mas tempo un persona por keda biba den su propio cas of cerca famianan cercano y tanto miho lo su salud ta pa un tempo mas largo.

Un di e metanan mas importante, segun e mandatario, ta pa persigui desaroyo di un “zorgzwardepakket”, unda ta investiga y dividi e tipo di cuidio segun e intensidad y costo pa evalua con por atende e poblacion cu ta embeheciendo.

Otro punto central ta enfoca riba mehoracion di cuidio di e adulto mayor den su propio cas. Un aspecto importante cu e mandatario ta remarca ta pa adultonan mayor keda den nan mesun ambiente.

Pa haci esaki posibel, el a splica, mester educa y prepara e famia(nan) di e adulto mayor pa nan por duna apoyo na nan ser keri. Adicionalmente por fortifica red socialnan pa yuda cu salud fisico y mental.

Tambe a lansa e proyecto PASADIA cu ta duna e adultonan mayor un espacio pa participa den actividadnan di recreacion y socialisacion, manera terapia di musica, weganan di mesa y combersa cu otro miembronan.

